

I. DISPOSICIÓN XERAIS

MINISTERIO DA PRESIDENCIA

9247 *Real decreto 634/2013, do 2 de agosto, polo que se aproban as directrices xerais dos plans de estudos do ensino de formación para a incorporación á escala superior de oficiais do corpo da Garda Civil.*

O artigo 11 da Lei 42/1999, do 25 de novembro, de réxime do persoal do corpo da Garda Civil, establece que o persoal do corpo da Garda Civil se agrupa en escalas, en función das facultades profesionais asignadas ao conxunto dos empregos de cada unha delas e ao grao educativo exixido para a súa incorporación.

O sistema de ensino da Garda Civil, de conformidade co artigo 19.1 da citada lei, ten como finalidade, entre outras, a capacitación profesional específica daqueles que se deben integrar en calquera das escalas do corpo, entre as que se encontra a escala superior de oficiais.

O artigo 20 da repetida lei, no seu punto primeiro, determina que o ensino de formación proporciona a preparación necesaria para a incorporación ás ditas escalas, e no punto cuarto establece que o citado ensino se impartirá en academias pertencentes á estrutura docente da Dirección Xeral da Garda Civil, aínda que para os que accedan directamente ao ensino para a incorporación á escala superior de oficiais, a lei dispón que cursarán unha primeira fase na Academia Xeral Militar do Exército de Terra.

Por isto, o número de prazas, os requisitos e as probas para o ingreso e o réxime dos alumnos réxense polas normas establecidas para as escalas superiores dos corpos xerais dos exércitos, na actualidade escalas de oficiais, tras a entrada en vigor da Lei 39/2007, do 19 de novembro, da carreira militar.

A Lei 39/2007, do 19 de novembro, introduce unha importante reforma do ensino militar, especialmente nos aspectos de ingreso e formación, e establece como requisito para o acceso ás novas escalas de oficiais dos corpos xerais, antes escalas superiores de oficiais, a obtención dun título de grao universitario. A formación realizarase en academias militares, que impartirán a formación militar, e nos centros universitarios da defensa adscritos a universidades públicas, creados polo Real decreto 1723/2008, do 24 de outubro, nos cales se proporcionará ensino correspondente a un título de grao. O desenvolvemento do novo modelo produciuse mediante a publicación do Real decreto 35/2010, do 15 de xaneiro, polo que se aproba o Regulamento de ingreso e promoción e de ordenación do ensino de formación nas Forzas Armadas.

Coa finalidade de continuar cumprindo co mandato legal previsto no artigo 20.4 da Lei 42/1999, do 25 de novembro, tras a aprobación da Lei 39/2007, do 19 de novembro, e até que se produza a actualización do réxime do persoal do corpo da Garda Civil segundo se establece na disposición derradeira sétima desta última, a disposición transitoria única do Real decreto 1959/2009, do 18 de decembro, polo que se crea o Centro Universitario da Garda Civil, prevé que durante a fase de dous anos que cursen na Academia Xeral Militar os que accedan directamente ao ensino de formación para a incorporación á escala superior de oficiais serán alumnos do Centro Universitario da Defensa alí situado, no cal recibirán o ensino universitario que se determine.

Dispón tamén que, finalizado ese período, se incorporarán á Academia de Oficiais da Garda Civil, onde completarán a súa formación tanto no aspecto militar, de corpo de seguridade e técnica necesaria para o correcto desempeño das funcións asignadas á escala superior de oficiais, como a correspondente aos estudos universitarios oficiais conducentes á obtención dun título de grao.

Faise necesario, por tanto, a determinación dunhas novas directrices xerais de plans de estudos co obxecto de dispor duns criterios de referencia polos cales se rexan as ensinanzas que deben cursar os alumnos para se incorporaren á escala superior de

oficiais, de forma que se preveza tanto o ensino universitario correspondente a un título de grao como o militar, policial e técnico dos futuros oficiais. Todo isto conforme o establecido no artigo 35 da Lei 42/1999, do 25 de novembro.

Para a redacción deste real decreto tívose en conta a distribución do ensino en períodos, prevista na disposición transitoria única do Real decreto 1959/2009, do 18 de decembro, e o Real decreto 1393/2007, do 29 de outubro, polo que establece a ordenación das ensinanzas universitarias oficiais, dado o compoñente de ensino universitario.

Na súa virtude, por proposta conxunta dos ministros de Defensa e do Interior, logo do informe do Ministerio de Educación, Cultura e Deporte, de acordo co Consello de Estado e logo da deliberación do Consello de Ministros na súa reunión do día 2 de agosto de 2013,

DISPOÑO:

Artigo único. Aprobación das directrices xerais dos plans de estudos do ensino de formación para a incorporación á escala superior de oficiais da Garda Civil.

Apróbanse as directrices xerais dos plans de estudos do ensino de formación para a incorporación á escala superior de oficiais da Garda Civil, cuxo texto se insire a continuación.

Disposición adicional primeira. Protección da maternidade.

No que se refire a este real decreto e respecto á protección da maternidade, atenderase ao disposto no Real decreto 293/2009, do 6 de marzo, polo que se aproban as medidas de protección á maternidade no ámbito do ensino nas Forzas Armadas.

Disposición adicional segunda. Empregos eventuais.

Unha vez que os alumnos reúnan as condicións exixidas para pasar ao terceiro curso do plan de estudos correspondente ao ensino de formación para a incorporación á escala superior de oficiais do corpo da Garda Civil, concederáselles, con carácter eventual e para efectos académicos, de prácticas e retributivos, o emprego de alférez, e incorporaranse á Academia de Oficiais da Garda Civil e ao seu centro universitario.

Disposición adicional terceira. Aplicación do Estatuto do estudante universitario.

Os alumnos do ensino de formación para a incorporación á escala superior de oficiais do corpo da Garda Civil que cursen estudos en centros universitarios da Defensa ou da Garda Civil unen á súa condición de universitarios a de militares, polo que, no exercicio dos dereitos e deberes recollidos no Estatuto do estudante universitario, aprobado polo Real decreto 1791/2010, do 30 de decembro, atenderase, respectivamente, ao réxime xurídico que rexe para as Forzas Armadas e para a Garda Civil que lles sexa de aplicación, así como, se for o caso, aos correspondentes convenios de adscrición asinados con universidades públicas en virtude do establecido no Real decreto 1723/2008, do 24 de outubro, polo que se crea o Sistema de centros universitarios da defensa, e no Real decreto 1959/2009, do 18 de decembro, polo que se crea o Centro Universitario da Garda Civil.

Disposición derogatoria única. Derrogación normativa.

1. Queda derogado o Real decreto 1563/1995, do 21 de setembro, sobre directrices xerais dos plans de estudos das ensinanzas de formación para acceso ás escalas superior e executiva do corpo da Garda Civil, no que se refire ao ensino de formación para a incorporación á escala superior de oficiais.

2. Así mesmo, quedan derogadas as disposicións de igual ou inferior rango que se opoñan ao disposto neste real decreto.

Disposición derradeira primeira. *Facultades de desenvolvemento.*

1. Autorízanse os ministros de Defensa e do Interior a ditar, no ámbito das súas competencias, cantas disposicións sexan necesarias para o desenvolvemento e execución deste real decreto.

2. No prazo máximo dun ano, contado desde a data de publicación deste real decreto, os ministros de Defensa e do Interior, conxuntamente, aprobarán os plans de estudos obxecto das directrices que se aproban.

Disposición derradeira segunda. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 2 de agosto de 2013.

JUAN CARLOS R.

A vicepresidenta do Goberno e ministra da Presidencia,
SORAYA SÁENZ DE SANTAMARÍA ANTÓN

DIRECTRICES XERAIS DOS PLANS DE ESTUDOS DO ENSINO DE FORMACIÓN PARA A INCORPORACIÓN Á ESCALA SUPERIOR DE OFICIAIS DO CORPO DA GARDA CIVIL

Primeira. *Obxecto e normativa aplicable.*

1. Establécense as directrices xerais dos plans de estudos do ensino de formación para a incorporación á escala superior de oficiais do corpo da Garda Civil.

2. Segundo o disposto no artigo 20.4 da Lei 42/1999, do 25 de novembro, de réxime do persoal do corpo da Garda Civil, e na disposición transitoria única do Real decreto 1959/2009, do 18 de decembro, polo que se crea o Centro Universitario da Garda Civil, durante os períodos que permanezan na Academia Xeral Militar, aos alumnos da Garda Civil seralles de aplicación a Orde DEF/1158/2010, do 3 de maio, sobre directrices xerais dos plans de estudos da formación militar xeral, específica e técnica para o acceso ás diferentes escalas de oficiais das Forzas Armadas, e a Orde ministerial 49/2010, do 30 de xullo, pola que se establecen as normas de avaliación e de progreso e permanencia nos centros docentes militares de formación para a incorporación ás escalas de oficiais das Forzas Armadas.

3. Para participaren nos procesos de selección para cursar as ensinanzas de formación para a incorporación á escala superior de oficiais da Garda Civil, os aspirantes deberán ter superado a proba de acceso á universidade prevista no artigo 38.1 da Lei orgánica 2/2006, do 3 de maio, de educación.

Segunda. *Principios reitores do ensino de formación.*

O ensino de formación para a incorporación á escala superior de oficiais rexerese polos seguintes principios:

a) Conformer un ensino orientado á aprendizaxe do alumno e asentado nun continuo proceso de tutela e seguimento, co fin de alcanzar os obxectivos propostos.

b) Garantir unha formación sustentada tanto na transmisión de valores e principios como de coñecementos e destrezas, de tal maneira que favoreza un liderado baseado no prestixio adquirido co exemplo, a preparación e a decisión para a resolución de problemas.

c) Ofrecer unha formación fundamentada no respecto aos dereitos e liberdades fundamentais, na igualdade de dereitos e oportunidades entre homes e mulleres, na protección do ambiente, na non discriminación das persoas por razón de raza ou relixión e no respecto á xustiza.

d) Xerar unha disposición motivadora de futuras aprendizaxes e capaz de se adaptar aos cambios que se experimenten tanto no ámbito social como no profesional.

e) Conseguir unha formación axustada aos fins perseguidos, mediante un proceso continuo de validación da calidade do sistema de ensino.

f) Considerar a función docente como un factor esencial da calidade do sistema de ensino da Garda Civil, recoñecendo o labor que realiza o profesorado e apoiando a súa tarefa.

Terceira. *Finalidade dos plans de estudos.*

Os plans de estudos terán como finalidade:

a) Proporcionar ao alumno a capacitación profesional necesaria para o desempeño das funcións e o exercicio das facultades que lle serán encomendadas ao se incorporar á súa escala.

b) Integrar as ensinanzas teóricas e prácticas de carácter profesional coa formación humana necesaria para o desempeño das funcións asignadas ao corpo da Garda Civil, e de acordo cos principios básicos de actuación contidos na Lei orgánica 2/1986, do 13 de marzo, de forzas e corpos de seguridade.

c) Dar cumprimento ao establecido na disposición transitoria única do Real decreto 1959/2009, do 18 de decembro, polo que se crea o Centro Universitario da Garda Civil.

Cuarta. *Criterios aos cales se deben axustar os plans de estudos.*

Os plans de estudos obxecto desta disposición elaboraranse conforme os seguintes criterios:

a) Garantir a completa formación humana e o pleno desenvolvemento da personalidade.

b) Fomentar os principios básicos e valores constitucionais, tendo en conta a pluralidade cultural de España.

c) Promover os principios básicos de actuación dos membros das forzas e corpos de seguridade e as virtudes contidas na Lei orgánica 11/2007, do 22 de outubro, reguladora dos dereitos e deberes dos membros da Garda Civil; nas reais ordenanzas para as Forzas Armadas, aprobadas polo Real decreto 96/2009, do 6 de febreiro, naquilo que sexan de aplicación á Garda Civil, e nas normas propias do corpo.

d) Proporcionar a formación requirida para o exercicio profesional na escala superior de oficiais.

e) Integrar o ensino militar, o de forza e corpo de seguridade e o correspondente a un título de grao do sistema educativo xeral, e ponderalos segundo as necesidades profesionais.

f) Combinar, na medida adecuada, as ensinanzas teóricas e prácticas.

Quinta. *Definicións.*

No ámbito destas directrices entenderase por:

a) Coñecemento: información asimilada no proceso de aprendizaxe.

b) Módulo: conxunto de contidos temáticos relativos a un ámbito de actuación determinado. Agrupa un conxunto de materias e disciplinas.

c) Materias e disciplinas: as materias son un conxunto de áreas do coñecemento caracterizadas pola homoxeneidade do seu obxecto, cun obxectivo común e criterios de avaliación explícitos, que se configuran nunha ou en varias disciplinas. As disciplinas son

unha selección de unidades de ensino-aprendizaxe en que se distribúe unha materia. Dentro da estrutura das disciplinas deberanse distinguir, ao menos, actividades formativas de tipo teórico, práctico, seminarios, conferencias e outras actividades de carácter individual ou colectivo, así como o traballo persoal e as probas de avaliación.

Sexta. Unidade de medida.

1. Nos plans de estudos do ensino de formación para a incorporación á escala superior de oficiais empregárase como unidade de medida o crédito europeo (ECTS). O número de horas por cada crédito europeo será de 25.

2. A instrución e adestramento computárase en días e semanas ou, se for o caso, en horas, conforme o seguinte:

a) En días e semanas, cando se imparta con carácter exclusivo, entendendo este como aquel período de tempo en que esta actividade é única e prioritaria no ensino de formación. Para efectos de cómputo, un día de instrución e adestramento será equivalente a seis horas da carga horaria semanal.

b) En horas, naqueles casos en que a instrución e adestramento se imparta de forma descontínua en diferentes días; neste caso, seis horas consideráranse equivalentes a un día.

En ningún dos dous casos a que se fai referencia nas letras a) e b) anteriores se computará dentro da carga lectiva, expresada en horas, dos plans de estudo da formación militar ou de forza e corpo de seguridade.

Sétima. Duración.

Os plans de estudos do ensino de formación para se incorporar á escala superior de oficiais da Garda Civil terán a seguinte duración:

a) Ingreso por acceso directo: 5 (cinco) cursos académicos. Os cursos 1.º e 2.º impartiranse na Academia Xeral Militar do Exército de Terra e no Centro Universitario da Defensa alí situado, e os cursos 3.º, 4.º e 5.º na Academia de Oficiais da Garda Civil e no seu centro universitario.

b) Ingreso por promoción interna: máximo de 2 (dous) cursos académicos, que se impartirán na Academia de Oficiais da Garda Civil e no seu centro universitario.

Oitava. Créditos.

1. O número máximo de créditos necesarios para a incorporación á escala superior de oficiais da Garda Civil, por acceso directo, será de 385 ECTS, dos cales 240 corresponderán ao grao universitario de Enxeñaría da Seguridade.

2. Para o acceso por promoción interna, o número máximo de créditos será de 160 ECTS.

Novena. Distribución da carga de traballo.

A carga de traballo que representa a execución dos plans de estudos distribuirase conforme os criterios seguintes:

a) A duración máxima dos cursos académicos será de 43 semanas, incluíndo os períodos lectivos, os destinados á avaliación, así como os dedicados a instrución e adestramento.

b) O número de semanas destinadas a instrución e adestramento será dun máximo de 30 no global do plan de estudos, que se poderán elevar a 32 sempre e cando as adicionais se inclúan no primeiro curso.

c) O número total de ECTS por curso académico non superará os 80, nin os 2,2 semanais.

Décima. Configuración modular.

Os plans de estudos configuraranse conforme os módulos e a súa correspondente asignación en créditos que se establecen no seguinte cadro:

	ECTS mínimos	ECTS máximos
Formación militar	30	40
Formación de grao	0	120
Formación de grao e de forza e corpo de seguridade	120	140
Formación de forza e corpo de seguridade	80	120

Décimo primeira. Definición dos módulos.

Defínense os seguintes módulos:

a) Formación militar: proporciona os coñecementos relativos á organización da Defensa Nacional, ás Forzas Armadas españolas en xeral, ás organizacións internacionais militares ás cales pertence España, así como os imprescindibles que permitan prestar os servizos e gardas que garantan o funcionamento e seguridade das unidades, centros e organismos. Impartirase na Academia Xeral Militar durante os dous primeiros anos en que se estrutura o plan de estudos.

b) Formación de grao: proporciona os contidos básicos en que se fundamenta o grao de Enxeñaría da Seguridade, sobre a base de que supón un conxunto coherente de coñecementos que permitan a adquisición posterior doutros de maior complexidade tecnolóxica e científica.

c) Formación de grao e de forza e corpo de seguridade: proporciona a adquisición duns profundos coñecementos tecnolóxicos, especialmente en medios e sistemas técnicos, para que o futuro oficial da Garda Civil dispoña dunhas excelentes competencias que lle permitan o correcto exercicio da profesión nos campos da prevención de ilícitos, protección de persoas e bens e investigación de sucesos.

d) Formación de forza e corpo de seguridade: proporciona a formación específica sobre procedementos de investigación, de protección e de actuación utilizados no corpo, así como o coñecemento doutras institucións de similares características con que o futuro oficial desempeñará as funcións propias do seu corpo. Neste módulo inclúense as materias de Lingua Inglesa, Instrución e Adestramento, e Formación Física e Orde Cerrada que se impartan na Academia de Oficiais da Garda Civil e no seu centro universitario adscrito.

O nivel de inglés que deberán alcanzar os alumnos do ensino de formación para se incorporaren á escala superior de oficiais da Garda Civil será similar ao B2 do Consello de Europa segundo se define no Marco común europeo de referencia para as linguas.

A materia de Instrución e Adestramento proporcionará a adquisición da práctica e habilidades profesionais. Esta materia englobará os exercicios e prácticas en unidades ou noutras institucións nacionais ou estranxeiras.

Décimo segunda. Asignación de créditos ás materias.

1. O número mínimo de créditos asociado a unha materia será de tres, excepto para aquelas que compoñan o módulo de Formación Militar e o módulo de Formación de Forza e Corpo de Seguridade que poderá ser inferior á cifra citada.

2. A distribución interna que se outorgou ao traballo presencial do alumno en cada disciplina non poderá ser superior ao 50% do total de créditos asignados a ela, excepto para aquelas que compoñan as materias de Formación Física e Orde Cerrada, en que o traballo presencial poderá alcanzar a totalidade.

Décimo terceira. *Deseño e contido dos plans de estudos.*

1. Os plans de estudos deberán conter o seguinte:
 - a) Perfís profesionais para alcanzar en función dos campos de actividade en que o garda civil desempeñará, no primeiro emprego, as funcións propias da súa escala.
 - b) Planificación temporal do plan de estudos.
 - c) Recoñecemento de créditos considerando a procedencia militar do alumno.
2. Os programas que desenvolvan os distintos plans de estudos determinarán as materias ou disciplinas susceptibles de seren impartidas parcial ou totalmente mediante ensino a distancia ás alumnas en situación de embarazo, parto ou posparto que non poidan asistir de forma presencial.
3. Os programas de estudos co fin de promover a formación no idioma inglés, con independencia do seu ensino a través dos créditos asignados a el nos tres últimos cursos, poderán incorporar a súa aprendizaxe mediante a impartición no dito idioma da totalidade ou parte dalgunha das disciplinas.

Décimo cuarta. *Efectos da superación dos plans de estudos.*

1. A superación dos plans de estudos do ensino de formación para acceder á escala superior de oficiais e a adxudicación dunha das prazas da provisión anual orixinará os seguintes efectos:
 - a) A adquisición da condición de garda civil e, por tanto, a de militar de carreira da garda civil, se non a ten previamente.
 - b) A atribución do emprego de tenente e a incorporación á escala superior de oficiais da garda civil.
 - c) Para os que ingresaron segundo a modalidade de acceso directo, o título de grao universitario correspondente ás ensinanzas recibidas.
2. A cualificación obtida ao finalizar o ensino de formación para a incorporación á escala superior de oficiais determinará a orde de escalafón, que só se poderá alterar por aplicación da normativa vixente.

Décimo quinta. *Modificación do plan de estudos.*

1. A modificación dos plans de estudos previamente establecidos conforme estas directrices xerais, que en todo caso se deberán axustar a elas, queda sometida, con carácter xeral, ás seguintes condicións:
 - a) Os plans de estudos terán unha vixencia temporal mínima equivalente ao número de anos académicos de que consten.
 - b) O plan de estudos modificado total ou parcialmente extinguirase temporalmente curso por curso.
2. Non obstante o disposto no número 1, cando os avances tecnolóxicos, didácticos ou doutra índole aconsellen a variación dos plans de estudos, os ministros de Defensa e do Interior establecerán sistemas de recoñecemento de créditos das materias ou disciplinas entre o novo plan que se aprobe e o anterior.

Décimo sexta. *Garantía de calidade.*

O sistema de ensino de formación da escala superior de oficiais estará suxeito a un proceso cíclico de validación co fin de detectar as súas disfuncións e, desta forma, adoptar as medidas correctoras que garantan un ensino de calidade que asegure a consecución das competencias necesarias para o posterior exercicio profesional.